



**JUDICIAL SYSTEM MONITORING PROGRAMME**  
**PROGRAMA DE MONITORIZAÇÃO DO SISTEMA JUDICIAL**

Press Realase:

Periodo : Dezembru 2009

Edisaun : Dezembru 2009

**KOMEMORA LORON 16 AKTIVISMU VIOLENSIA KONTRA FETO: JSMP  
HAMUTUK FOKUPERS LANSA RELATORIU ARTIGU 125 KODIGU PROSESU  
PENAL**

Iha loron 10 Dezembru 2009, nebe mak sai hanesan loron mundial ba Direitus Humanus no loron ikus ba kampanya loron 16 aktivismu violensia kontra feto, JSMP liu husi Unidade Justisa ba Feto (WJU) hamutuk ho Fokupers komemora loron importante ida ne'e hodi halo lansamentu ba relatoriu **"provizaun artigu 125 kodigu prosesu penal nia implikasaun ba vitima violensia domestika"**.

JSMP no Fokupers hanoin katak loron mundial ba direitus humanus ne'e, lolos laos atu komemora deit, maibe importante liu mak tenke hatudu mos asaun konkretu ruma nebe mak bele fo kontribuisaun ba implementasaun prinsipius direitus humanus, liu-liu ba vitima sira atu nune'e bele hetan justisa nebe mak justu tuir lei no prinsipiu sira konaba justisa nian.

Relatoriu ne'e lansa ho intensaun atu fo rekomendasaun ba orgaun kompetente atu bele tau iha konsiderasaun, no karik iha possibilidade, bele halo revizaun ba artigu refere. Tamba tuir JSMP no Fokupers nia hare katak implementasaun artigu refere fo impaktu la diak ba vitima violensia domestika.

Situasaun hirak ne'e identifika liu husi rezultadu monitorizasaun husi JSMP-WJU no akompanyamentu legal nebe mak Fokupers halo. Iha kazu barak mak taka no arguido la hetan pena ba krime nebe mak nia komete tamba iha julgamentu nia laran tanba kauza husi implementasaun husi artugu ne'e. Bazeia ba regras prosesusual nian, antes tama ba prosesu julgamentu, juis sempre fo introdusaun ka esplika ba vitima kona ba artigu refere. Katak laiha obrigasaun ba vitima ne'ebe mak iha relasaun familia tantu axendente, dexendente, maun ka alin, afin to grau rua adotadu ka adotante atu fo sira nia depoimentus hasoru arguido.

JSMP no Fokupers fiar katak, membru familia ida sente laran todan atu fo sasin hasoru nia membru familia rasik iha tribunal. Ne'e laos sempre ka totalmente atu interpreta katak, laran todan ne'e nudar asaun kunsensual atu defende ka promove unidade familia. Bele kontrariu ho ida ne'eba kazu sira iha violensia domestika, asuntu kona ba inbalansu ba poder ne'ebe bain-bain eziste iha relasaun familia bele sai nudar instrumentu ida atu halo presau ba vitima hodi rekuza

atu fo sasin hasoru nia fen ka laen, bele sai razaun importante liu ba sasin ne'e. Nune'e mos nu'udar situasaun dilematiku no traumatiku ida ba vitima atu relembra ka hamoris fila fali situasaun esperensia violentu ne'ebe nia simu iha tribunal laran, no dala ruma ho difikuldade multipikadu balun tan, ne'ebe vitima sira infrenta wainhira asesu ba justisa, deskoraza ka hafraku tiha hanoin ba "liberdade atu hili" esepisaun ba relasaun familia ne'ebe mak lolos tenke proteze.

Bazeia ba razaun hirak ne'e mak JSMP no Fokupers propoin ba autoridade kompetente atu halo revizaun ba artigu 125 kodigu prosesu penal

Refere ba realidade ne'e JSMP hamutuk ho Fokupers rekomenda katak Artigu 125 KPP tenke esepisaun ba kazu *violensia ne'ebe mak kontra sasin rasik no violensia domestika ne'ebe involve ema ne'ebe sei iha tinan 18 mai kraik*, atu nune'e vitima sira bele hetan justisa ne'ebe mak justu ba hahalok krime ne'ebe mak sira hasoru.

JSMP espera katak orgaun kompetente liu-liu Governu liu husi Ministeriu Justisa atu bele halo revizaun ba artigu 125, hodi nune'e vitima violensia domestika bele hetan justisa bazeia ba prinsipiu direitus humanus no konvesoens ne'ebe mak ratifika no simu ona hanesan lei iha Timor Leste.

Atu hetan informasaun klean favor kontaktu:

Luis de Oliveira Sampaio

Diretur ezekutivu JSMP

Diresaun E mail: [luis@jsmp.minihub.org](mailto:luis@jsmp.minihub.org)

Landline: 3323883